

刻司寇晉峯李公撫蜀奏議序  
中丞晉峯李公撫蜀之二年一龍  
方捧蜀藩之檄在途聞公晉少司  
寇兼程疾走冀得面受繩墨至則  
值公候代未行幸從諸大夫後摳  
衣執牒詣轅門而被容接者凡一  
月餘雖遇合無何然未為不遇矣

嘗謂蜀地古稱沃野環蜀實皆山也土瘠民貧比年數遭大役公甫下車布德宣和興利除弊壹意愛養休息不踰期月民乃大治偶歲大饑山居者艱於食公下令所司移粟以周之全活甚衆屬郡凡八轄邑百餘散處山谷間不賢有司

徃多掊克其民為自肥計有捆載以去而得苟免於罰者自公撫蜀而貪墨者易心即有之朝聞而夕斥之矣公固舊天曹也臧否黜陟誰能逃藻鑑自是吏治肅而民瘼甦四境之內晏如也蜀地多夷其西北一帶與黠番隣尤屬難馭歲

時鴛鴦為患從來未有得志者  
昔孔明相漢未平吳魏先定西南  
以固根本此番不勦安攘之義謂  
何用是儲糧積餉選將厲兵集眾  
思屈群力一舉而殲滅之斬首無  
筭遺虜遠遁不敢近邊西土底寧  
按臺上其事於

朝

聖天子至為之告

廟宣捷待公以殊典而全蜀之民嗣  
今永得安堵者公之力也公且且  
夕經畧期為地方永杜禍本未嘗  
以大捷自滿一龍受事以來入而  
聽令出而啓公所下司札諄諄皆

全蜀善後計也當約諸司及諸郡  
邑奉揚德意何敢失墜公行且有  
日其撫蜀日諸所措置必先  
聞而後見諸行事故欲知公之行事  
惟奏牘為可攷力請於公出之一  
龍始得受而全讀之因刻之於紫  
薇堂中夫公之德業已往則中朝

播譽將來則宇內承休其所設施  
何限而此刻特公一時事耳顧其  
偉績豐功照耀今古不有纂述後  
將何觀古人不云乎不習為吏視  
已成事此刻既成播之民間傳之  
不朽異日公秉銓宅揆置身廟堂  
之上而其精神其議論昭昭然長

在眉山三峽之間執此以往其無  
所失矣豈惟一時抑將百世賴之  
一龍因敢僭為之序

萬曆十九年十二月吉旦四川布  
政使司左布政使新安余一龍頓  
首拜書

督撫奏議卷之一

目錄

奏報督撫交代疏

季報地方雨雪疏

參報延緩賑用疏

方面患病懇休疏

急缺方面官員疏

地方災傷請蠲疏

參究貪汙武職疏



更調縣令官員疏

蜀藩設立宗正疏

議裁巡司冗役疏

縣印模糊請換疏

叅論府佐曠職疏

邊令地方相宜疏

府佐患病乞休疏

急缺方面官員疏

叅論不職將領疏

甄別賑災官員疏

請換威茂關防疏

教職遵例迴避疏

督撫奏議卷之一

奏報督撫交代疏

欽差提督軍務巡撫四川等處地方都察院右副

都御史臣李 謹

奏爲交代事臣原任太常寺卿萬曆拾柒年貳  
月貳拾伍日准吏部咨爲缺官事該本部等  
衙門會推題奉

聖旨李尚思陞都察院右副都御史巡撫四川等  
處地方提督軍務寫勅與他欽此欽遵備咨到

臣臣隨赴鴻臚寺報名詣

闕謝

恩都察院到任參月貳拾玖日領

勅書壹道

陛辭於捌月貳拾貳日入蜀准前任兵部右侍郎  
兼都察院右僉都御史今養病徐

咨送

原領

符驗關防并吏卷到臣接管行事外伏念臣受才  
綿庸賦性愚戆向執玉帛以贊

郊廟尚慙俎豆之無聞茲分

符節以鎮封疆益愧軍旅之未諳矧巴蜀扼塞之  
地乃華夷表裏之區羌環於邊虜伺於外陰  
兩當先綢繆民困於木士疲於戈物力全藉  
休息必推威信大吏始展綏靖壯猷譟焉如  
臣豈其克任所期丹心對

白日矢竭精力於遐方敢因

廊廟遠江湖遂忘

天顏於咫尺臣下情不勝屏營之至爲此具本謹



具奏

聞

季報地方雨雪疏

題爲傳奉

聖諭事萬曆拾柒年玖月初拾日據四川布政使  
司呈奉前督撫徐都御史案驗遵依行准分  
守川西東北上下川南各道咨報所屬府州  
縣萬曆拾柒年夏季雨澤到司查得成都府  
龍安府馬湖府敘州府各所屬潼川州邛州  
雅州眉州嘉定州瀘州并所屬俱稱霑足保  
寧府順慶府所屬中多霑足惟隣水縣營山

縣陸月分全無夔州府所屬亦有霑足者重慶府所屬五月俱稱霑足仲季貳月有貳分參分者有止壹分者惟綦江縣武隆縣陸月全無以通省計之則雨澤全歉禾苗枯槁者莫如重慶等處爲甚等因呈報到臣案照萬曆拾陸年捌月內准兵部咨前事該巡撫寧夏都察院右僉都御史梁問孟奏本部覆議內開除見今各被災地方應報事宜仍聽撫按諸臣查議具

奏外其餘邊腹省直合行巡撫衙門各將所屬境內某處雨雪霑足某處雨雪全無某處雨雪幾分每季壹報仰慰

宸衷按臣巡歷無時不必會疏等因題奉

聖旨奏報雨澤原係舊制這季報俱依擬行欽此欽遵備咨前撫臣已經通行該司道府州縣遵照訖臣於捌月末旬接管查得夏季雨澤例應按季具

題緣前撫臣徐

抱疴

俞告起行東歸未及

題報今據前因諺臣覆看得蜀省夏季雨澤川西南北率稱霑足農事有秋川東夔州府所屬雖云愆期收亦可半惟重慶府屬兩澤全歉秋禾無收小民嗷嗷實爲可憫除另疏奏報外理合具

題緣係傳奉

聖諭事理爲此具本謹具題  
知

叅報延緩賑冊疏

題爲賑濟

奏報延緩數年謹遵

旨查叅以肅法紀以惠災民事據四川布政使司呈奉臣案驗前事仰司速將本司并合屬三年掌署印信官員職名及各經管月日作速具報以憑施行奉此該本司查得萬曆拾肆年六月二十三日奉兩院案驗爲天久不雨民隱可憂仰體

聖衷亟圖脩省事備案仰司卽便轉行守巡各道  
嚴令各府州縣掌印官將見被災傷地方查  
勘輕重分數的實及酌量存貯倉穀或全給  
或半給通詳請支定限日期給賑毋得遷延  
遲滯該司總將給過人戶支過穀石數目造  
冊呈院

奏繳青冊送部查考其無災去處亦將見貯錢  
穀堪備賑濟若干類冊齎院報部等因奉此  
本年六月內該本司前任左布政使今陞廣

西巡撫劉 到任接管遵照督行至萬曆十  
五年三月內據各屬陸續冊報未齊間本官  
聞報陞任本年三月二十一日將印信交代  
本司右布政使今陞左布政使彭富接管行  
催未齊十月十八日該本司今大察聽調左  
布政使趙睿到任接管至萬曆拾陸年各屬  
冊報已齊本官責令該吏謝天擎類造間隨  
因赴京應

朝於本年九月二十五日交與本司今任左布

政使彭富接管天擎自思兩年併造懼恐罪累將稿隱匿不造致蒙嚴催勘合事件該本司審追冊稿將本吏究罪革役呈詳兩院批允造冊

奏繳去後今奉前因該本司查得全省地方萬曆十四年分止有巫山萬縣梁山東鄉巴州通江南部銅梁八州縣萬曆十五年分復有合州安岳射洪遂寧南江巴州秦江巫山奉節涪州大昌鹽亭十二州縣各稱災傷隨該各府州縣備申守巡各道委官勘明酌量輕重通詳兩院批允俱於彼時動支倉穀放賑並未稽延至於賑畢冊報本司類造

奏青文冊一時川省道里遠近不等各屬冊報互異駁查延捱如十四十五年文冊俱至十六年三九兩月始獲就緒既已催齊又該左布政使趙睿看稿准行併造而該吏謝天擎隱匿成稿故擬革役非敢罪吏以求蔽也并將各府州縣三年掌署印信官員職名及

各冊報到司年月日期具揭呈詳到臣案照  
先准戶部咨前事該禮科給事中梅國樓題  
本部覆議合行各該撫按督行司道嚴令府  
州縣掌印官將被災地方查勘輕重酌量賑  
濟毋許遷延一面將支過穀石給過人戶名  
數造冊

奏繳青冊送部查考其無災去處亦將見貯錢  
穀堪備賑濟若干冊報本部以便臨時

請發又准戶部咨爲看詳章奏查叅

奏報稽遲并申未議以究

皇仁事該戶科都給事中姚學閔等題本部覆議  
以後蠲賑過被災地方饑民文冊及遇蠲免  
賑恤文移俱以彼處接到之日爲始酌量地  
里遠近四川定限十二箇月如期造報各等  
因題奉

欽依移咨前巡撫兵部右侍郎兼都察院右僉都  
御史徐 俱經備行該司遵照督行造報去  
後催據該司併造冊報前撫臣會同巡按四

川監察御史傅 查覈明白已將遲匿該吏  
究革并將賑過饑民給過穀數及無災存貯  
各花名數目造冊具本

奏繳訖隨准戶部咨前事該戶科都給事中王  
繼光等題稱四川賑冊報遲乞將三年經手  
官員重加罰治該本部覆查賑冊四川定限  
十二箇月造報今十四五年至十七年方報  
三年經手官員委當重加罰治但見任離任  
俱在彼中合行四川撫按官備查各年經手  
官員職名不分見任陞任作速叅奏前來以  
憑覆

請罰治等因題奉

聖旨是各該經管官員著撫按官查叅具奏欽此  
欽遵移咨到臣已行該司查將三年經管官  
員具報去後今據前因該臣會同巡按四川  
監察御史傅 議照賑災恤患

朝廷每加意於窮民申令致期撫按恒責成於  
長吏故發倉以救饑饉貴在及時按冊而為

劑量期於速報均之不可緩也今本省萬曆十四五年分合巫等州縣災民彼時勘報詳允卽行給賑是矣然豈可以賑之及時而遂視冊報爲末務哉乃各州縣申報稽遲該司委難類造兼以官更吏代沉閣因之故行催奚啻再三遷延仍復乃爾續據該司呈稱該吏謝天擎隱匿冊稿將本吏究罪招詳前撫臣徐 批行革役併查請支原案及訪各州縣饑民委於彼時給賑方會同按臣傳 將

賑過饑民給過穀數并無災存貯各人戶花名稻穀數目造冊

奏繳是冊雖報於今歲而賑實行於當年旣經該科叅以遲違則各年經管官員誠有不能辭其咎者第查賑恤文冊先經部議題奉

欽依四川定限十二箇月造繳部限不爲不寬然此責該司總其成耳非所以論州縣也州縣必先期造報而後該司可依期類齊蓋駁查往返不無耽延日時覈實發造遽難責效且



夕若州縣以十二月爲率則比及稽查而部  
限已先逾矣况該司職兼條貫州縣責專分  
理難易旣殊遲速宜別故今查叅在該司應  
照部限而在有司宜半之所謂大絃急則小  
絃絕小絃不急則大絃將益弛而不張也合  
無將賑災者非經

題覆未奉部文應以賑畢之日計六箇月冊報  
到司爲率而積貯備賑者必俟年終方有定  
數則又當以次年六月終爲率除如期報到

者俱免叅究外其賑後至六月之外與無災  
延至秋冬方報者相應據實查叅及查布政  
司陞任左布政使劉繼文於十四年六月內  
到任十五年三月內報陞本官行催未齊遂  
爾遷轉離任且在春季之內似難責以稽遲  
左布政使彭富於十五年三月接管催促未  
齊十月內卽交今調任左布政使趙睿行催  
至十六年春則十四年分已齊於時卽當速  
造齋繳却乃遷延不完只至秋季而十五年

分亦齊始令併行類冊又因本官赴

京屆期遂致該吏乘機沉匿此其疎庸之罪難  
辭十六年九月內復交彭富接管緣先已蔽  
隱卒難稽察本官承催清理至次年三月方  
報於限亦屬有違均應叅治叅照四川布政  
使司調任左布政使趙睿職專綜覈事涉因  
循卽吏胥之敢於作奸見案牘之漫不經意  
應從重罰見任左布政使彭富當帶管之時  
而督催欠嚴責誠難諉自摘刷之後而冊報  
就緒情在可原應示薄罰馬湖廣安東鄉  
府州縣知府等官林焜章等心存玩愒視例  
限若虛文政尚優游以

奏報爲細事冊完獨後法宜併懲但趙睿已經  
大察調簡林焜章張謙德宗傳張志久李思  
誠蕭洪譚孔仁張大成張渭蒲林杜傑吳守  
約方簡黃立中王密邢懋敬鄒學詩楊騰龍  
楊國棟吳一契首守心俱已考察去任降調  
丁憂致仕事故離任訖相應免究彭富顏若

愚蘭養直安祚祿有政李陶成郭才華馬明  
衡馮賜王曰然劉正譚恕張鵬翼段達王繼  
聖任國相張守剛許裕德吳登高陳堯仁章  
宗理王良謨宜訓王之幹俱各見任陞遷罪  
罰自難辭諉內彭富似應量從薄罰顏若愚  
等所當重加罰治以示警戒者也再照前項  
文冊部議原謂賑冊遵限

奏繳貯冊報部稽查分析甚明乃當事者不察  
原文並行溷造顧因貯冊遲報以致賑冊耽  
延已往旣懲將來當議臣等切惟賑冊

奏繳定有限期唯恐災民失所也依期造報孰  
曰不宜但一歲之內被災有各處不同放賑  
有各時不一若槩以一律則後賑未畢而前  
限已違若隨賑隨繳則州縣零星而  
瀆奏煩瑣均非長便合無以後除係通省災傷  
亟宜

奏報其有應賑零災趁時給恤俱俟周歲類總  
奏繳仍以次年爲率遵照部限造報毋許稽延

其積貯穀數止報本部查考不得槩入賑冊  
如此則事規畫一督率者便於責成期限嚴  
明奉行者易於遵守似不易之法也伏乞  
勅下該部再加查覈酌議上

請施行庶儲蓄益清而生民永有賴矣緣係賑濟  
奏報延緩數年謹遵

旨查叅以肅法紀以惠災民事理未敢擅便為此  
具本謹題請

旨

方面患病懇休疏

題爲中途患病不能復任懇乞休致事據四川  
布政使司呈蒙巡按四川監察傅御史批據  
夔州府呈准本府應

朝知府朱讓關稱本職係廣東廣州府南海縣  
人由進士歷陞今職萬曆拾伍年捌月貳拾  
伍日到任自筮仕至今中外歷俸壹拾伍年  
並無公私過名切念本職樗櫟庸才謬荷  
聖明不棄正宜策勵供職以稱任使豈敢遽求休

致負

國厚恩但薄劣之人叨

恩過分災害隨生自朝

覲事竣赴任於中途感受風寒延綿日久至陸月  
內因見劄限已逼兼程冒暑行至湖廣巴陵  
縣地方復染瀉痢日甚一日調治未愈正欲  
勉強前進不惟生死莫測誠恐到任虛弱不  
能治事反重瘵曠之罪不得已自其求退不  
敢久妨賢路儻得抵家苟存一日實

聖明生全之恩也併將原領部劄合關本府轉報  
准此除將關到水程申繳布政司外理合呈  
報作缺等因緣由蒙批布政司查報蒙此該  
本司看得夔州府知府朱讓敷歷中外素著  
賢聲入

覲事竣例應復任乃至中途偶罹劇疾不能履道  
事非得已既將原領水程申繳到司又查無  
過限情弊所據告要休致相應俯從呈請具  
題施行等因到臣卷查先准吏部咨爲循職掌

陳未議以仰裨

聖治事該吏科給事中袁國臣題本部覆以後  
請告官員在外仍令撫按官代

奏等因題奉

欽依移咨前來通行遵照外今據前因該臣會同  
巡按四川監察御史傅 議照夔州府知府

朱讓表屬夙著端貞臨民雅稱愷悌旣應

朝而告竣事宜復任以竟猷爲不意疾劇中途  
遂爾情耳休致勘查已確似應准從合行題

請伏乞

勅下該部將知府朱讓准令致仕員缺另爲銓補  
嚴限前來任事庶政務不致久弛而地方一  
切攸賴矣緣係中途患病不能復任懇乞休  
致事理未敢擅便爲此具本謹題請

旨

急缺方面官員疏

題爲急缺方面官員事據四川布政使司呈該  
本司查得分守川北道乂已缺官近報推補  
叅議周思稷係湖廣麻城縣人差吏行催赴  
任間隨據本役回司稟稱本官於萬曆拾柒  
年陸月貳拾日在家染病身故等情又准按  
察司牒呈准分守川東帶管兵巡下川東道  
今陞任叅議來經濟關稱據夔州府呈報新  
任下川東道副使趙九思傳牌於萬曆拾柒

年柒月初伍日到府差吏書迎任間隨據孔文茂等稟稱各役跟隨趙副使於本年陸月拾玖日行至河南開封府新鄭縣惠民舖本官染疾身故等因各呈報到臣卷查先准吏部咨爲缺官事內開所屬司府等衙門遇有員缺照例開

奏等因遵行外今據前因該臣會同巡按四川監察御史傳議照蜀省爲西南奧區監司官關係甚重况川東地接土夷川北山藏草竊所賴以彈壓而消弭之者全在監司今俱乏人地方可慮伏乞

勅下吏部早爲遴選推補堪任官貳員嚴限前來到任管事庶員缺不致久虛而地方均有攸賴矣緣係急缺方面官員事理爲此具本謹具題

知



地方災傷請蠲疏

題爲地方重大災傷懇乞

聖明亟賜蠲恤以蘇民困以消隱憂事萬曆拾柒  
年玖月貳拾伍日據四川布政使司呈准分  
守川東帶管兵巡上川東道左叅議今陞任  
來經濟咨准本司咨本年柒月拾貳日奉前  
巡撫徐都御史批據重慶府申據合巴等貳  
拾州縣各報災傷緣由到府該本府知府王  
軒看得府屬地方附山爲田土脈淺薄水利

既無所瀦灌漑惟賴天澤迄今陸月以來正當貳稻開花吐穗之時乃天道恒暘乾暵太甚雖間有微雨土膏未霑相隔踰月漑其苗者未及其根滋其花者復槁其實彙稔盡枯秋成無望弱者鬻妻棄子四散逃移壯者相聚爲盜公行搶奪若非亟議蠲恤其爲地方隱憂關係匪細等因又據巴縣申據梓潼等樹拾里民何軒陳登現等訴稱生靈所資在食一日無食父母妻兒不能相保本縣地方

土石相半遇旱先枯去歲旱傷猶得半收小民揭借完賦賣物易粟方得聊生今春微雨栽插頗完即今早穀方纔吐穗連旱貳月收種全無縣花粟豆如火燒死遲穀含苞似甑蒸熟人渴無水畜熱無池等情到縣該本縣知縣項應祥看得縣屬地方倚山鑿田殆非平原可比民拙於力亦無陂堰備潦所借賴者不過天澤乃今夏中以來恒暘亢原隰盡爲一赤貳稻顆粒無收今觀嗷嗷待哺之

民悉起洶洶欲竄之志萬一瓦解計將安施  
所當速爲蠲賑以安民心等因照詳俱奉批  
仰布政司速查報奉此移咨本道准此又蒙  
巡按四川監察傳御史批據重慶府并合巴  
等貳拾州縣各申同前事俱蒙批分守川東  
道查議速報蒙此又奉巡撫徐都御史紙牌  
看得該府申報被災州縣甚多未分孰輕孰  
重查得見行

明例有災宜即踏勘分數明白

奏報仰道即將原報災傷州縣作速查明詳報  
以憑具

題至於賑貸救荒之術亦須籌畫加意撫綏無  
致失所奉此又蒙巡按四川監察傳御史紙  
牌行道即將被災地方覈勘明實分別重輕  
作速具由通詳又蒙查得重慶府屬申報田  
禾盡槁秋成無望百姓嗷嗷及查川西川南  
地方時歲豐登相應糴穀發賑牌行川西川  
南各道查將庫貯存留備賑銀兩解發各屬

糴穀壹萬石運發重慶府分給賑濟又行本  
道出示曉諭小民安心守分以俟陸續救賑  
等因蒙此俱經備行重慶府委官踏勘并出  
示曉諭去後今據合州申稱踏勘得本州災  
傷有捌分者有柒分者涪州申本州災傷有  
捌分者有柒分陸分者忠州申本州災傷有  
捌分者有柒分者巴縣申本縣災傷有玖分  
者有捌分者長壽縣亦稱本縣災傷有玖分  
者有捌分者江津縣申本縣災傷有捌分者

有柒分陸分者大足縣申本縣災傷有捌分  
者有柒分者永川縣申本縣災傷有柒分者  
有陸分者榮昌縣申本縣災傷有伍分者銅  
梁縣申本縣災傷有柒分者有陸分者墊江  
縣申本縣災傷有柒分者有陸分者璧山縣  
申本縣災傷有捌分者有柒分陸分者定遠  
縣申本縣災傷俱及捌分安居縣申本縣災  
傷俱及柒分綦江縣申本縣災傷有捌分者  
有柒分者南川縣申本縣災傷有柒分者有

伍分者鄆都縣申本縣災傷有玖分者有柒分陸分者武隆縣彭水縣各申本縣災傷有陸分者重慶衛申本衛災傷有玖分者有捌分柒分者黔江千戶所申本所災傷有陸分者各造冊申府轉報到道覆看相同及將前項州縣衛所分別重輕議賑緣由移咨本司又據重慶府申稱府屬地方今歲旱災異常饑饉爲甚夏月秋初人情洶洶搶掠徧起如燎方揚難於撲滅幸賴兩院司道加意賑恤移粟通糴地方人心稍覺安帖第恐冬春之交地利已盡商販無常問閭空乏人情事勢尚有不可預度者而衣衾之戒桑土之謀凡有民社之寄牧芻之責者安得不兢兢也儻蒙兩院曲念黔黎卹危之狀有司失職之憂俯賜題

請俾

廟堂之上曉然知川東地方萬分難處即異日地

方有他虞催徵不及數尚可逭罪戾於萬一  
若以

宸嚴不可荐瀆

天恩難以再徵止議賑恤不蒙蠲免竊恐撫字之  
恩不足以勝催科之擾有司顧忌程督之嚴  
降調之辱剛果者鞭笞濫加不顧民瘼難乎  
其爲下矣仁厚者體恤太過坐致課殿難乎  
其爲上矣院司軫及於此亦必不忍官民交  
受其病而不爲破格一處者爲今之計惟有

計量應免分數暫議停徵查議勘動官銀抵  
補俟豐收之歲照數帶徵補庫庶寬一分百  
姓受一分之賜有司遣一分之責等因到司  
該本司左布政使彭富議照四川連歲以來  
適當採辦之役又值師旅之興民力困於徵  
輸正供竭於調遣富者益貧而貧者益窶所  
望時和年豐家給人足庶乎枯槁可蘇而渙  
散可收矣夫何徃歲旣災而今年更旱雖川  
西各處固未凶荒若川東所屬則在在告沴

緣此地方山嶺盤旋既少溪河之蓄洩而田  
土瘠薄又乏陂堰之積澍一遇旱傷五穀無  
望即今枵腹待哺拾室致空各懷溝壑之憂  
盡忘室家之戀不惟無告之民餓莩相望而  
不逞之輩剽掠將行其於目前之虞非細故  
也荷蒙兩院軫念民瘼批行勘處又蒙巡按  
傳御史糴穀萬石發府賑濟一時人心稍覺  
相安顧本司竊計拯救災患惟有蠲賑貳端  
舍此別無他策今前項被災州縣在重慶府

則議停徵在分守川東道則議賑恤貳議俱  
屬有見通應呈請續據分巡帶管分守川北  
道副使徐儒呈據順慶府申蒙本道紙牌蒙  
巡按四川監察傳御史批據廣安渠縣隣水  
南充營山大竹陸州縣各申報旱災緣由俱  
蒙批分守川北道查報蒙此牌仰本府行據  
廣安州申稱踏勘得本州災傷有采分者有  
陸分者渠縣隣水縣各申本縣災傷俱及樹  
分南充縣申本縣災傷有捌分者有陸分者

營山縣申本縣災傷有捌分者有柒分者大  
竹縣申本縣災傷俱及伍分各報到司轉申  
到道該本道看得前項州縣災傷委屬重大  
皆本道履任之初經由各該地方所目擊者  
即今民多逃移已就食於他方將來冬春之  
交饑寒愈迫誠不可不爲之慮也據各勘報  
輕重不同議處當別如廣安渠縣隣水南充  
營山伍州縣災傷爲甚應議

請蠲而大竹壹縣災傷伍分止應議賑伏乞俯念

民艱亟爲題

請等因各呈報到臣卷查萬曆拾叁年柒月內准  
戶部咨爲欽奉

聖諭并陳未議以廣

德意以消災沴事該本部題內開今後但有災傷  
去處掌印官逐一親自踏勘總計被災地畝  
以定分數一面申巡撫具

奏一面造花名地畝文冊送巡按覈實定擬的  
確分數從實奏報待本部題覆至日即按冊



各照例蠲免等因題奉

欽依備咨前來通行遵照訖今查前項災傷先據重慶府并巴縣各於柒月初貳日報到前撫臣徐 批行該司速查未報間緣以抱病俞告起行東歸未及

題報臣於捌月末旬接管行催去後今據前因該臣看得蜀省地方在昔頗稱樂土錢糧不至乏缺乃頻年以來採辦之後既殷師旅之興復繼財力疲敝殆非昔比今貳後方休川

民稍獲貼席所望天幸其國歲事告豐庶幾民樂其生可無愁嘆不意三巴地方復遭旱暵而重慶府所屬特甚自入伍月以迄秋初亢暘爲虐雨澤不施以致貳禾盡枯秋收絕粒不逞漸起勢甚洶洶幸賴按臣易粟萬石轉發重慶府屬一時人心方稍安帖目今穀價猶湧民不聊生枵腹啼饑張口待哺其所望於

上之拯救不啻大旱時之望雲雨也若不亟為議

處必多流離死亡且饑寒切身易於為暴則  
將來地方意外之患尤有可慮者矣臣如以  
災後入境業過報期而猥秦越其民不一  
請命於

君父之前

陛下所以付臣西鄙假臣便宜者謂何馬用為撫  
哉臣又惟

國家賦稅毫不可缺若於此奄奄待斃之民加  
以鞭笞追徵之苦其不變而為盜者幾希而

亦卒何益於

國家錢穀之數也當此之時欲善撫字又欲善  
催科臣之才庸實不辦此除一應撫恤事宜  
次第舉行及聽巡按衙門勘議外謹遵例上  
請伏乞

皇上軫念巴民久因復罹旱災相仍

勅下戶部速行覆議將前項被災州縣衛所照例  
蠲賑庶

天恩浩蕩不以遐陬見遺而矜此窮黎或有更生

之望且地方可保無他虞矣緣係地方重大  
災傷懇乞

聖明亟賜蠲恤以蘇民困以消隱憂事理未敢擅  
便爲此具本謹題請

旨

叅究貪汙武職疏

題爲賊官斃命事據四川按察司整飭安綿利  
保石泉兵備僉事張世則呈問得犯人左承  
勳年三十歲利州衛右所軍丁招稱本衛散  
拘在官指揮劉惟麒云云將劉惟麒叅呈到  
臣除批如擬左承勳等追完紙贓發哨發落  
劉惟麒聽叅外該臣會同巡按四川監察御  
史傅 叅照四川都司利州衛指揮同知劉  
惟麒偶承委署大肆貪饕倚微權而朘削多

端自賈部曲之怨指公費而科求無忌更開  
賄賂之門

憲紀罔遵官常大玷所當提問盡法以警武人者  
也緣係在外軍職未敢擅便爲此具本謹題  
請

旨

更調縣令官員疏

題爲縣官不宜地方乞

賜更調以明器使事據四川按察司分巡川北道  
副使徐儒呈奉臣紙牌諮詢屬官賢否凡才  
品有宜於煩與簡者一併開報以憑議處奉  
此行據保寧府呈稱閬中縣知縣郭魁出身  
貢途守己原無疵議惟性資紆緩以致胥吏  
爲奸諸務多廢相應預處及查本府所屬昭  
化縣知縣楊應兆到任今已踰年保甲脩明

四境安靖且才守俱優似非彈丸之地可久  
棲也合無將二官互調庶於地方有裨等因  
到道該本道查得閬中縣地處衝煩以知縣  
郭魁治之似爲不足昭化縣地稍簡僻以知  
縣楊應兆治之似爲有餘若二官互調易地  
皆宜似應俯從等因到臣簿查撫屬官員已  
經牌行諮訪去後今據前因該臣會巡按四  
川監察御史傅 看得閬中縣知縣郭魁操  
知砥礪政尚和平不妄用鞭刑無有十里甲

亦知勉脩職業者但其猶豫不決聽審動至  
經旬鈴束欠嚴積猾不無縱肆蓋其誠有餘  
而明不足志若銳而才近疎閬中縣附郭繁  
難之邑委非本官所勝及查昭化縣知縣楊  
應兆青年偉度壯志宏才勤振刷百廢俱興  
勵廉隅一塵不染投之簡僻未逞康莊此二  
臣者一則地窘其才一則才優其地欲明器  
使委宜互更伏乞

勅下吏部再加查議如果臣等所言不謬將郭魁

楊應兆互相更調庶在郭魁策勵方始而小  
邑克堪在楊應兆盤錯既當而利器自別矣  
緣係縣官不宜地方乞

賜更調以明器使事理未敢擅便爲此具本謹題  
請

旨

蜀藩設立宗正疏

題爲莊誦

綸音仰窺

展親至德乞

賜推廣條例以慰貧宗以圖治安事據四川布政  
使司呈稱行准守巡川西并提學道各咨牒  
回稱行據成都府申稱行准長史司牒稱查  
得

蜀府宗學宗正俱遵奉原行已經設立承休今

奉行查與

周府事體相同牒府申道看得宗正承休先經  
設立管理彼因條例未載題

請向未具

奏各移文到司覆查得本省宗學於萬曆八年  
建立該長史司啓

王推舉

汶川王府奉國將軍讓栲爲宗正專教

德陽等府宗生宣趣等一十八位肄業後因讓

栲患病於萬曆十四年復舉

德陽王府鎮國中尉承休接管陸續又送

內江等府宗生承鯁承鱸等二十位在學習讀

今查承休篤行可則彝訓有條果堪宗正俟

教有成績仍候舉薦等因到臣案照先准禮

部咨該吏科給事中張應登題本部覆議合

候

命下行河南撫按官會同該府作速推舉宗正一

員務在得人毋私親昵仍行各省撫按備查

宗生有無習學有無專官教養中間有無勤惰其加意宗學教有成績者撫按復

命之日即行舉薦如宗生有文理粗通志向可取者照例優之以廩每歲提學官考試分別等第以示勸懲中間有如勤儉勤教學行著聞者不妨薦揚以為樂善之勸等因題奉

欽依備咨前來案行該司查報間續據長史司呈奉

蜀王令旨查得宗正承休賦性溫醇持身端慎

儒言儒服慕中壘河間之風德行德容為公族

宗盟之表相應比照

周府事例題

請授以宗正之任以便專教等因由詳又經批司會同守巡川西道查明併議去後今據前因該臣會同巡按四川監察御史傳議照宗學既建必設官以董其羣師範貴端在擇人而授之任今



蜀宗之學以鎮國中尉承休充爲宗正已數年矣緣拘往例未曾具

題今行據司道等衙門勸得本宗果屬學行兼優師道無忝臣再加諮訪輿論攸同理合會疏題

請伏乞

勅下該部查照近例將

蜀府鎮國中尉承休准授宗正教習宗生俟其閱歷歲月果能以身率人誨提不倦弦誦鬱

起才賢斌斌臣等當具疏薦揚以行旌勸如其久而隳頽有慙厥職則敷教之任亦不可以虛居也緣係莊誦

綸音仰窺

展親至德乞

賜推廣條例以慰貧宗以圖治安事理未敢擅便爲此具本謹題請

旨

議裁巡司冗役疏

題爲議裁巡司以省冗費事據四川布政使司  
呈奉臣批據四川按察司分巡帶管分守上  
川南道副使陳明經呈蒙巡按四川監察御  
史傅 案驗據蒲江縣申詳條議冗役當革  
一款查得本縣所轄雙路巡檢司原設巡檢  
壹員弓兵叁拾名以路當名蒲邛雅之交奸  
細易主私販間出設之盤詰又因天全土夷  
不時出沒督率防禦以備非常參平日久邊

徹底寧卽有鼠竊狗偷本縣嚴行保甲可恃  
無虞亦何必留無用之兵於不必用之地也  
查隆慶年間議減弓兵十名至萬曆十二年  
間又議減工食然與其議減何如議革且弓  
兵本資盤詰今該司路當平曠原非要害之  
區自來未聞擒一賊捕一奸巡檢員缺已十  
五六年矣近於萬曆十五年始除一員到任  
未久即故本縣常親至其地查點弓兵間有  
無賴棍徒及無食餓夫充當有官則乘機擾

民無官則虛糜工食夫以二十弓兵特設一  
官以總之又歲徵百十餘兩以供之甚屬無  
謂議者恐其離天全土夷僅有百里一時竊  
發緩急是賴然該司北去夾門關洞清堡止  
十里西至百丈驛十五里東南至邛州與本  
縣各二十里舖舍聯絡軍民錯居縱夷性莫  
測亦必不能越洞清夾門百丈以向雙路之  
黑竹縱徑向黑竹而二十無賴之夫亦豈能  
制梃以禦之以爲巡檢弓兵悉宜裁革其俸

糧工食歲可減銀一百二十餘兩庶幾損無  
益之供以蘇疲困之邑申詳到院案行本道  
備行邛州查得雙路巡檢司北有夾門關凡  
火井草池等寨諸夷由板橙山一路而出者  
必經夾門又北有洞清堡凡磨刀鳳凰等溪  
諸夷由石梁山小路而出者必過洞清洞清  
設有堡軍統於大渡所百戶夾門設有弓兵  
統於火井壩巡檢又兩路至關前合爲一路  
即通邛州蒲名兩縣誠土夷之咽喉也入此

即地皆腹裏民皆編氓又二十餘里方至該  
司設在邛雅往來大路平原曠野實非險隘  
處所若於洞清夾門嚴加防禦此外竝無夷  
人來路勢必不能徑向該司又查得該司設  
自景泰六年比時尚無夾門關亦無洞清堡  
至正德初年始設堡於洞清又正德十年添  
設巡司於夾門於是險隘有備而雙路官兵  
視為冗矣該縣議裁委屬妥當具申本道議  
將雙路巡檢司官俸并弓兵工食裁革免徵

火井巡檢久未除補以州佐遙署未免缺人  
廢事亦宜併

題選補等因照詳奉批仰布政司速議詳報奉  
此覆行該道勘議前來該本司議得雙路巡  
檢司原爲天全土夷出沒設此專司盤詰繼  
增堡關二處犄角譏防是雙路之官兵在昔  
固稱緊要在今實爲贅疣委應裁革及照該  
司新任巡檢劉梧似應改補火井壩巡檢免  
行起送等因呈詳到臣簿查先據分守上川

南道呈前事已經批司再議去後今據前因  
該臣會同巡按四川監察御史傅 議照巡  
司之設原以控扼險要禦暴防奸今蒲江縣  
之雙路巡檢司因續增關堡以爲外籬故該  
司官兵及居內地日無一事歲糜百金夫何  
爲哉裁之誠便既經司道等官覆勘已明相  
應題

請伏乞

勅下吏部再加查議如果臣言不謬將雙路巡檢

司裁革官吏俸糧弓兵工食臣等行司免編  
該司印信另行

奏繳見任巡檢劉梧改補邛州火井壩巡檢免  
其起送以恤卑微庶官無冗員地無冗役亦  
節財省費之一端也緣係議裁巡司以省冗  
費事理未敢擅便爲此具本謹題請

旨

縣印模糊請換疏

題爲印信事據四川布政使司呈奉臣批據高  
縣申本縣印信壹顆自正統肆年正月鑄造  
至今百有餘年篆文平乏模糊真僞難辨及  
查印上篆文原係高縣之印肆字乞要鑄換  
由詳奉批仰布政司查報奉此行據敘州府  
查驗申報前來該本司看得高縣印信自鑄  
給行使至今壹百伍拾餘年辨驗篆文委果  
模糊不便行用呈乞會

題鑄發等因到臣卷查先准禮部咨爲遵奉  
明旨釐革宿弊事內開以後各該巡撫會同巡按  
官每年通查所屬大小衙門如有應換印信  
明開篆文字數具

奏換給舊印亦代爲

奏繳又准禮部咨爲傳奉事內開各撫按官通  
查所屬衙門印信如有模糊未經換給者作  
速具

奏以憑覆

請鑄換等因各移咨前來進行遵照外今據前因  
該臣會同巡按四川監察御史傅議照高  
縣印信篆文不明委於防奸未便據呈乞要  
鑄換相應具

題伏乞

勅下該部鑄造高縣之印壹顆前來給發行用其  
舊印聽臣等代爲

奏繳緣係印信事理未敢擅便爲此具本謹題  
請

旨

府佐官員曠職疏

題爲朝

覲官員久不還任乞

賜重懲以警曠廢事據保寧府申蒙巡按四川監察傳御史巡歷本府紙牌行查該府同知張夢麟自萬曆拾陸年應

朝因何久未復任曾否差人催促有無別項事故查明由報蒙此該本府查得本官自拾陸年拾月離任入



覲大察存留於正月內事畢出京因便過籍山東  
已曾差人催促近聞赴部改限尚未回任等  
因通申到臣案照先准吏部咨爲朝

覲事該本部題稱朝

覲存留官員事畢卽便辭

朝依期赴任有過違例限者聽各撫按官叅奏  
處治題奉

欽依通行遵照又查得問刑條例內開官員赴任  
在外佐貳首領等官違限壹月以上問罪半

年以上降級別用捌箇月以上罷職其朝  
覲復任官員違限者照前例擬斷今據前因該臣  
看得

國家設官分職以爲民理非使之自便其身圖  
也故凡朝

覲齋捧官員雖因公出例皆催促赴任正恐其玩  
愒日月廢事曠官耳今同知張夢麟才本綿  
弱

大計幸留正宜竭力驅馳以圖報效乃

簡書弗畏久濡滯於

王程故里高棲猶虛糜乎官廩律以人臣之義豈是夙夜在公縱云道里之遙業已四時盡踐據該府申稱見經改限改限與否固不可知然未有今年春首辭

朝來年春暮未任而猶可聽其優游置之不問者也該臣會同巡按四川監察御史傅 叅照保寧府同知張夢麟佐府尋常戀籍延緩素餐之恥罔念適已之便何安曠職已及壹朞揆法當加參褫伏乞

勅下吏部再加查議將張夢麟照例重究遺下員缺另行銓補庶玩吏知懲而官守克盡矣緣係朝

覲官員久不還任乞

賜重懲以警曠廢事理未敢擅便爲此具本謹題請

旨

邊令地方相宜疏

題爲邊令地方相宜

請乞加銜久任以重疆圉事照得吏部見行事例  
凡司道郡縣等官但有與地方相宜人心相  
安者資淺則加服俸資深則陞職級等因在  
卷近據四川按察司整飭安綿利保石泉兵  
備僉事張世則呈稱本道遵奉

明例出巡安縣石泉霸底永平等邊堡閱視城垣  
操演兵馬撫賞番夷查驗得石泉縣知縣強

勉建議如添設火草坪堡及展修復土堡城  
并議增觀化墩軍房皆本官調度有功又據  
白草壘拾捌寨番牌頭嶺麻山等同通事劉  
冬陽等面稟本道禱說每年受

朝廷賞賜又許我們通買賣得鹽喫得布衣穿  
卽是

朝廷百姓番不敢作歹了強知縣好官留他再  
做拾年使我們蠻子好過等語據此則本官  
不准有勞於邊堡抑且有孚於夷情此在本

道目觀耳聞非得之撲風捉影者也顧本官  
歷俸將及兩考遷轉應在旦夕石泉以蕞爾  
小邑在山險絕徼極爲苦寒往往新選官來  
者聞風規避赴任延緩動至年餘然此雖係  
小縣乃切近白草諸番住牧之所西鄰松潘  
東接龍安實夷夏之咽喉各關堡之總會誠  
不可壹日缺官也若將本官議

請加銜久任庶地方得人而邊關有賴等因到臣  
看得龍安府所屬石泉縣地居險塞環以番

蠻外撫內脩全藉令長據該道條議前因誠  
爲有見該臣會同巡按四川監察御史傳  
議照石泉縣知縣強勉恇懦無華羌夷且乎  
於恩信拊摩不懈保障益壯乎金湯且人情  
非樂居夷而本官處此遐荒已近陸載據其  
勞勩揆之土情委應加銜久任以示激勸以  
便責成者也伏乞

勅下吏部查果臣言不謬覆議上

請將知縣強勉加陞府同知職銜照舊管事庶人  
與地相安而絕徼省更代之擾番與漢胥悅  
而邊籬無窺伺之虞矣緣係邊令地方相宜  
請乞加銜久任以重疆圉事理未敢擅便爲此具  
本謹題請

旨

府佐患病乞休疏

題爲府佐患病危篤不能供職乞

賜休致事據四川布政使司呈奉臣批據四川按

察司分巡上川東道兼整飭兵備副使朱運

昌呈先奉臣批據重慶府駐鎮黃平督糧撫

夷通判喬應萃呈稱本職陝西鞏昌府秦州

清水縣人由舉人歷陞前職萬曆拾柒年叁

月初拾日到任不意伍月內染患風寒腹脹

延至拾月轉成癱患半身不遂醫藥難痊呈

乞休致等情奉批仰兵巡上川東道查報奉  
此行據該府查得本官癱病是真調理肆月  
愈加沉重乞休竝無別情緣由呈道該本道  
看得通判喬應萃屢次稱病情詞懇切行府  
查果危篤似難勉留合無准從休致等因照  
詳奉批仰布政司議報奉此該本司看得黃  
平係邊夷之地而駐鎮有彈壓之權迺通判  
喬應萃到任雖近壹年抱病已逾數月似此  
要區豈能臥治相應呈乞會

題等因到臣卷查先准都察院咨准吏部咨爲  
叅究府佐官員擅自回籍以警將來以肅臣  
節事內開外官告休自知縣以上例應題

請等因備咨前來通行遵照外今據前因該臣會  
同巡按四川監察御史傅 議照重慶府駐  
鎮黃平督糧撫夷一官遠在邊徼環以土司  
較之腹裏郡佐責任尤重况今夷情會勘防  
衛正殷如通判喬應萃者業成廢疾曷勝任  
哉既經該司道府勘明相應照例具

題伏乞

勅下吏部查議將本官准令致仕員缺另行選補  
嚴限前來庶地方不致缺人而邊務亦有攸  
賴矣緣係府佐患病危篤不能供職乞

賜休致事理未敢擅便爲此具本謹題請

旨

急缺方面官員疏

題爲急缺方面官員事據四川按察司呈准本  
司分巡川北道副使徐儒關稱萬曆拾捌年  
叁月拾柒日接到家報父徐汝乾於本年正  
月拾壹日在家病故儒係次男例應回籍守  
制等因關司轉呈到臣查先准吏部咨爲  
缺官事內開所屬司府等衙門遇有員缺照

例開

奏等因遵行外今據前因該臣會同巡按四川



監察御史傅 議照分巡官員彈壓一方關係甚重即在無事亦難缺人今川北歲祲之後雖已普賑民食猶艱春夏之交青黃未接所藉以督率有司撫綏而消弭者視平時尤為喫緊伏乞

勅下吏部選推相應官員速來任事庶憲紀之有理有資而蜀門之重地攸賴矣緣係急缺方面官員事理爲此具本謹具題

知

叅論不職將領疏

題爲論劾不職將領以重閩寄以固邊關事臣竊照巴蜀疆事惟番與蠻然其部種錯落巢穴險阻非有北虜之控弦百萬難與櫻鋒非如南倭之倏忽千里不能逆防也好則人怒則獸者固犬夷之常態惟文武將吏戮力同心固我藩籬布我威信將見雪山三城邛笮之戍烽烟永消矣若使債帥庸夫分符提旅其不至於啓戎心爲禍首者幾希臣叨爲文

武大帥聞外事臣所司也故自入疆之初即  
將諸邊將領等官嚴行體訪欲更置其不稱  
者以重干城茲聞數月聞見既真敢不為

皇上陳之訪得叅將管小河漳臘等處遊擊將軍  
事宰調元本以庸流謬膺間寄當進兵建越  
之會恣攘臂攫取之圖設家兵以濫糧則言  
人徐至中李逢陽等歲冒不下百金託常例  
以科米則百戶楊應升周承芳輩供送百石  
百石軍機可預洩耶而乃駕保全之說勸

阿五安處銀伍拾兩公然市恩過付者心腹  
黃卷周世臣也細作當嚴禁矣而乃緩進安  
之罪挾求徐韶文銀叁拾陸兩竟行釋放見  
證者鄉總王銳常元兒也發鹽井鹽斤運之  
涼山轉央土婦瞿紹良市易麂皮等貨令逃  
軍師進德販省圖利卽但僧之行不汙於此  
矣驅敗虜牛羊變價入已復將夷婦阿妹等  
窩占柒捌口差軍牢楊貴春押送私家雖捨  
竊者流又何以加焉宿黎州徐氏家誑說救

夫先通姦而後詐金拾兩俱憑小杜兒指引  
全無愧念遣舍人董成入巢探賊既奏功而  
顧匿賞銀拾伍兩又將董成打死豈有良心  
擅給把總冠帶每名受禮拾兩出銀者王銳  
尹曉李天德楊兆是也指稱獎勵名色每次  
索銀拾伍兩被害者千百戶楊仲相梅知春  
俞希道盧繼遠非歟今居小河雖因老病乞  
骸骨未及題

請輒棄職守臥他方壩底石永等處守備王鼎才  
非脫穎志在克囊新班旗軍有點班每貳錢  
以爲例李孫兒等千捌百餘名卽闕壹而不  
可牢伴鼓吹有牢帽每肆錢以爲常盛康一  
等壹百餘名不取足而不休以巡歷關堡爲  
名目則旣索旗軍併及鄉勇壩底大印共陸  
拾餘兩石泉永平共捌拾餘兩皆李狗皮等  
爲之私收以考察叅謁爲由頭則旣科使費  
又派下程永平壩底各陸兩石泉大印各伍  
兩咸景士中等爲之備送假銀布以買皮蠟

而皮蠟與銀布並還揚狗兒其證也加之廣取  
山椒致鄉勇余尚美等不勝其腴削發回銀以  
換黃金而黃金與回銀並入侯雲五其證也却  
又故禁淘金致金夫梁尚友等復有所行求  
獲常例而未厭於是有寅夜責比衣甲之刑  
鄉勇侯國李恭等赴訴不願食糧情豈得已  
剝軍士而不足於是有更班坐留堡官之例  
千戶朱家隆李中孚等各有綾絲銀布事屬  
橫行霸底堡把守以呈換百長而有拾兩之  
通白印墩總甲以道路坍塌而有貳罪之贖  
乳臭未經世務徒取怨於三軍紈袴難與兵  
機祇流毒於諸堡平番等處守備吳坤貌狀  
頗偉幹局亦優奈履任未踰貳期邁罹風疾  
致蒞官頽灰百念旁落事權平番堡屋地本  
官物也凡哨總去住皆宜查閱而昏憤不理  
鄧三策張順等敢行私賣雪欄溝地方是蠻  
寨也凡部兵往來時當約束而威令不振王  
正富明啓等得肆交通書手羅友文指官誑

觴有實跡矣及百總傅朝政革退倒賊其陪  
銀貳拾兩平日之受制可知商人陳金玉放  
債剝軍已招結矣縱官舍徐仕華通同起滅  
見告提數拾人懲奸之法體安在關堡主軍  
有一隊者有兩隊者時當年節每隊索香豬  
貳口共計肆拾餘口豈曰公需開墾邊地有  
軍佃者有番佃者歲遇收成每堡索青稞參  
石共計伍拾餘石悉充私廩操兵雷洪李虎  
等戍軍周受四楊勝等脫逃接踵優恤部卒

者如是乎堡官栗朝聘路上進等戍官田紹  
武揚仲魁等淫酗相仍嚴明率屬者不然也  
松潘邊徼番情最為不常守備要司以治曷  
克有濟雅黎等處守備丘奕貌匪魁梧才充  
茸關旣踈防禦之策惟恣囊橐之謀假更換  
以勒見面則該司軍伴壹百名雅大軍伴壹  
百名每名勒銀貳兩斂送者曹義王甫才也  
指委印以索謝禮則鹽井百戶張一中紫石  
指揮田蔭每人索銀拾伍兩過度者張應元

景天順也賣放招討高仲德祖母越渡飛仙  
關已受銀盈壹頂而乃諉罪於把關劉昌國  
駕禍信為巧矣私縱流徒李伏枝親男頂死  
軍名籍已收銀拾兩而遂嫁軍妻於班頭王  
甫才滅跡一何深歟官軍月糧數有定額也  
乘關領而每名剋銀壹錢計得柒捌拾兩方  
行給散豈惜剋盡肌膚誤操軍人律有明條  
也已拘提而每名詐銀伍錢計得貳叁拾金  
捏稱逃亡安知難掩耳目濫受呈詞不審輕

重狀輒盈篋批行皆千戶阮鳴為之代理多  
科罪贖一切取盈人至鬻子上納彼軍妻李  
氏頓恨無兒由千夫之長而驟躡守司叨冒  
已踰涯分無一籌之布而更希速化素行雅  
善鑽求且所部土婦土司最稱桀驁難御似  
此尸居之輩全無服遠之威以上肆臣或貪  
婪剝削而部伍咨嗟或病廢綿庸而職守妨  
曠俱當亟行議處以警官邪者也再照臣部  
內裨將自副總兵以下坐管守備以上才貳

拾人耳臣頃者論斥壹告病叅將矣茲壹疏  
而論肆人豈故爲是苛刻哉臣誠見債帥一  
日不去則軍士一日不安軍士不安則疆場  
不靖古人謂一家哭何如一路哭者臣平居  
極是之故不敢博長厚之名使此五人恣蠶  
部曲也且此肆人之外臣豈敢遽信其皆稱  
我果能鑒戒惕厲威信式弘臣且多之豈敢  
效世俗態遇例過搜如其不然臣遂能默默  
已乎臣之於文職諸司大都亦若爾矣伏乞

勅下兵部再加查訪如果臣言不謬將宰調元等  
通行革斥王鼎仍行提問遺下各員缺速爲  
選補嚴限前來任事庶戎行鮮匪人之叅而  
劔外資保障之力矣緣係論劾不職將領以  
重閩寄以固邊關事理未敢擅便爲此具本  
謹題請

甄別賑災官員疏

題爲賑事久完甄別已確乞

賜議處不職官員以重

德意以勵人心事據四川布政使司呈准守巡上  
川東道咨牒并據重慶府造繳賑濟饑民文  
冊到司卷查萬曆拾柒年拾貳月內奉巡撫  
李都御史紙牌爲便宜發動倉穀移濟災民  
以溥實惠以宣

德意事照得天災流行何處無之設法賑濟守土



額責本院欽奉

璽書得以便宜行事非有司斤斤守尺寸者比今  
歲重慶順慶旱荒本院一入境內卽行據實  
馳報懇

請蠲賑今待

命日久未得

綸音深惟恤災捍患如拯水火曠時久遠勢難復  
待且今冬春之交舊穀旣沒新穀未升餓莩  
流離諒所必至本院深居幕府無由睹聞若

不親加咨詢誰肯披讀相告憂此民瘼永懷  
不寐除順慶府所屬項卽批行如議動發倉  
穀亟行賑濟并重慶被災各州縣積貯一應  
銀穀及二府蠲賑事宜恭候

明旨至日另行外查得成都府并所屬州縣積貯  
穀石頗多翻患泥爛此中沃野千里無虞凶  
荒以其有餘補助不足旣爲不費之施又得  
周急之實仰司官吏卽行成都府將本府并  
所屬沿江州縣可通舟楫處所積有倉穀者

酌量動支共足參萬石盤運明白即便選委  
能官發舟徑往重慶一應盤費等項銀兩就  
於該司支用一面馬上星夜行文重慶府知  
府即查所屬被災州縣某處原報幾分今景  
象若何應發穀石若干太守親民之官睹聞  
必確劑量預定運穀至彼境上即便分發被  
災州縣仍行各掌印官務須查審貧窮躬親  
放賑毋假手於佐貳毋託權於吏胥毋破冒  
於豪猾毋刁難於里老其鄉村山谷阻遠不

能赴領者掌印官務須移粟就賑不得憚煩  
偷安至於饑餓不能出門流徙不在賑數乞  
丐號呼可憫并當隨宜施給糞粥招食務令  
人人霑被毋使向隅泣悲斯稱本院奉揚

主恩綏靖西土之意賑畢本院仍密行查訪料理  
得法境內輯寧者亟加獎慰其有玩視民艱  
拯救無術者輕則戒飭重則論斥成都所屬  
發穀務出鮮實可春斛斗歸一該司計議舟  
次重慶毋過正月中旬一應未盡事宜并此

外有長便者該司詳議妥當作速施行事完之日將賑過穀石造冊報院

奏繳註銷本院此檄一出事在必行時不容緩敢有觀望稽延阻撓教令者伍品以上徑自  
叅

奏餘即拿問重處非以虛言相誑也該司仍即刊刻大字告示徧發貳府被災州縣通行張掛曉諭有司官闕葺不才視公檄爲虛文百姓失所無裨荒政者得以赴愬院司道府無

禁馬奉此本司隨即轉行遵照及刊示曉諭仍督同成都府分派發運本府并成都華陽温江參縣各叁千石崇慶漢州金堂新繁資縣郫縣柒州縣各貳千石簡州新津夔流灌縣肆州縣各壹千石共叁萬石各動官銀雇船差官管押運至重慶府酌量轉發間又奉本院紙牌爲再議速賑以濟貧民事照得重慶地方災傷重大頃該本院便宜檄行布政司轉行成都府屬沿江州縣各將倉穀酌動

共足參萬石俱限正月月中旬運至重慶府交  
收及行兵巡上川東道并該府劑量分發專  
賑貧民去後今該本院會同巡按傅御史議  
照前項被災貧民當此冬春之交饑寒迫切  
待賑甚殷誠恐前穀運發一時不能速至難  
濟燃眉查得該府見有按院發穀壹萬石并  
分守川東道議准買穀貳萬石陸續當有到  
者及查本府并所屬州縣積貯備賑倉穀頗  
多擬合會行從宜急賑仰司即便轉行該道

督行重慶府將按院前發穀壹萬石并續買  
穀貳萬石到者連見貯備賑倉穀查照本院  
原行檄文事理速行各該掌印官查審貧窮  
躬親放賑候成都府屬運穀至日照數查收  
抵還前借之數以備再發此參萬石外如被  
災州縣既多分發無幾各州縣先將所貯倉  
穀酌量放賑以俟旦暮蠲賑

旨下本院會同按院區畫施行通造賑冊數內該  
道府務須悉心經理嚴行查覈勿致衙後市

棍及足食人戶混冒窮民反不霑恩放賑完日卽此一事定各官賢否揭報仍將賑過穀數及各花名造冊齎司類報覈

奏奉此本司亦卽轉行遵照本月內又奉本院案驗准戶部咨爲地方重大災傷覈勘已實懇乞

聖明特賜蠲賑以安民生事該四川撫按衙門各題稱重慶府所屬合巴等州縣衛所各被災傷重大乞要照例蠲賑本部覆議題奉

欽依移咨備案仰司官吏卽便馬上移文守巡川東道轉行該府所屬被災州縣將該年錢糧遵照分數停徵候來歲秋成照數徵補衛所屯糧該司酌量災傷輕重照例議詳析徵其備荒銀兩收買雜糧并按院原發穀壹萬石及各州縣倉貯稻穀查將被災饑民隨宜從優賑恤委賑官員慎加遴選務使饑民得霑實惠其本院原發穀叁萬石令各掌印官一查照原行躬親放賑事完該司將停徵錢

糧賑過各倉穀并兩院買運發運各稻穀及  
饑民數目分別款項造冊齎院

奏繳奉此又經備行該道府州縣遵照將民糧  
照數停徵屯糧另議折徵仍照題

准事理并節行文案作速放賑間續奉本院紙牌  
照得順慶府動穀賑濟已造文冊前來重慶  
府賑事亦報將竣所有貳府用過錢糧俱應  
查覈而放賑官員亦宜區分以便勸懲仰司  
官吏卽查成都府屬某處某處原動倉穀若

干用過兜索船價若干運發何處曾否取獲  
批收重慶府屬某處某處原奉成都府分發  
與西南貳道買運穀各若干貳府被災州縣  
各在倉稻穀若干奉某明文動過若干賑過  
饑民若干是否小民親領均霑實惠有無奸  
豪衙役混冒侵漁逐查明白備細造冊呈覈  
以憑會

奏其貳府放賑官員該司會同按察司從公查  
訪某官料理得法放賑及時民霑實惠某官

玩視民艱拯救無術物議沸騰一一評品的  
確另具揭報以憑酌量施行奉此又經備行  
查報去後今該道回稱據重慶府申稱府屬  
各州縣萬曆拾柒年內因被災傷奉本院紙  
牌行司於成都府屬發運穀叁萬石并原蒙  
巡按傅御史牌行川西上川南各州縣買運  
穀壹萬石又奉兩院批允動支備荒銀兩解  
西南州縣買穀壹萬捌千玖百伍拾肆石壹  
斗并叁合續於敘州府倉那運穀壹千石

共伍萬玖千玖百伍拾肆石壹斗柒升叁合  
內除分巡下川南道議呈兩院批允於前買  
穀石內撥發壹千玖百陸拾貳石伍斗截留  
合江縣賑濟及壞船失穀叁百肆拾玖石實  
運到府穀伍萬柒千陸百肆拾貳石陸斗柒  
升叁合并川南解還未買穀價銀柒百肆拾  
兩貳分該本府知府王軒遵照節行牌案酌  
量輕重將運發買發稻穀及各州縣見貯倉  
穀令掌印官審實貧窮躬親放賑經該掌印

等官巴縣已故知縣許安國長壽縣已故知縣儲登選署印本縣儒學教諭施所學合州知州宋希張涪州署印本府通判岳一崙江津縣署印本府通判皇甫賓并知縣唐選大足縣署印合州儒學學正許登瀛忠州知州錢効節壁山縣知縣張思明定遠縣知縣劉養用綦江縣署印忠州儒學學正葉繼龍并先署印本府照磨伍遷鄧都縣署印主簿楊宗桂銅梁縣知縣李陶成黔江縣知縣繆守

之安居縣知縣祝存正武隆縣知縣羅俊民彭水縣知縣黃承讚南川縣知縣徐天佑榮昌縣知縣初學易永川縣知縣鍾國芝墊江縣知縣趙弘訓計貳拾州縣前運穀內除敘州府壹千石存貯重慶府倉外分發各州縣穀伍萬陸千陸百肆拾貳石陸斗柒升叁合并各預備倉穀共支過柒萬伍千肆拾捌石捌斗捌升內般運人夫工食穀肆百貳拾玖石伍斗伍升實支穀柒萬肆千陸百壹拾玖



石叁斗叁升銀肆百伍拾肆兩叁錢賑濟饑  
民貧生共叁拾萬玖千貳百陸拾壹名口及  
查分巡下川南道牒稱該本道議呈於瀘州  
預備倉并義倉動穀賑濟該州饑民由詳奉  
撫院批該州既稱穀價騰貴民食甚艱准動  
支倉穀及時速賑務使饑民早霑實惠毋容  
積猾冒關事完冊報布政司領報其富民輸  
粟一節如議行繳奉此依行該州動穀貳千  
陸百玖拾肆石陸斗賑濟饑民貧生壹萬叁

千柒百貳拾名又牒稱該本道議呈合江縣  
應賑饑民由詳奉撫院批合江既稱與江津  
同災倉貯無幾饑民可慮著先儘倉穀卽行  
盡數發賑外其登運川東穀准留貳千石以  
濟燃眉但須編賑貧窮毋得徇情繼富如不  
遵憲示輒効他方謬舉置饑民於溝壑反議  
恤足食之家及論議紛紛耽延時日無裨急  
濟者該管有司定行拿問重處決非虛言事  
完冊報繳奉此依行該縣將截留買運川東

穀壹千玖百陸拾貳石伍斗并本縣預備倉  
穀共動貳千肆百叁拾貳石叁斗捌升貳合  
賑濟饑民貧生壹萬柒千捌百零貳名又查  
奉節縣奉兵巡下川東道紙牌該本縣具申  
肆里小民無食乞賜賑濟由詳奉撫院批據  
申米穀價增小民艱食仰兵巡下川東道卽  
查該縣倉貯一面酌行賑給使饑民霑惠毋  
容積猾冒侵一面具由詳報奉此又經覆詳  
批允依行該縣動穀壹千壹百柒拾肆石叁

斗賑濟饑民貧生肆千捌百壹拾捌名各移  
文中報前來俱該本司覆查明白及照原案  
內開運穀一應盤費就於本司支用後恐往  
返稽遲因令就動官銀費用除另自查明於  
該州縣項下開銷外相應備造文冊呈乞覈  
實

奏繳等因到臣又據布政司呈准守巡川壯道  
咨牒并據順慶府造繳賑濟饑民文冊到司  
查得貳道移文內稱據該府申稱本府并所

屬各州縣萬曆拾柒年內因被災傷本府具  
申請動南充縣倉穀伍百石賑濟極貧災民  
并動穀煮粥以給既食貧人等因申詳撫院  
奉批據呈煮粥飯資如議動穀貳千石若慮  
就食人衆只多設粥廠選委廉幹人役管理  
自可周徧再查議賑南充縣極貧止伍百石  
果否已足及照各被災州縣除批前申照數  
賑貸外尚有剩穀頗多者儻賑極貧及煮粥  
不敷不妨一面酌量再支一面具數申詳通

候事完冊報奉此該知府王九德遵照於本  
年拾貳月及拾捌年正月內眼同本府陞任  
通判謝庭菊并推官劉懷民於府倉稻穀內  
動支陸千壹百捌拾玖石捌斗賑濟饑民叁  
萬伍千貳百貳拾柒名口隨該本府見得各  
處流移之民擁聚府城甚衆具申請於無災  
蓬州西充縣各動穀壹千石岳池儀隴貳縣  
各動穀貳千石雖被災傷原積穀多大竹縣  
動支壹千石運府分賑由詳奉撫院批據申

派民日衆倉穀無多委應移粟接濟如議於西充蓬州儀隴岳池肆州縣照酌定石數動支運放該府悉心料理務期無擾地方其運穀人役亦宜計給費資使樂供事大竹縣剩穀甚多堪以那賑但距府頗遠陸運或艱若於饑民內分撥人數量給食資付以印票使就該縣領穀隨到即放不必候齊較於移粟爲便如此策可行准動該縣倉穀肆千石儻阻遠不便則罷一應未盡事宜本院難以遙

度者該府從長計議舉行此繳又蒙巡按傅御史牌行本府於府屬州縣見貯倉穀內通融動支其各處流民便宜給穀多寡諭令各歸田里趁時耕種以冀秋收毋得久住在此反至失望此於賑恤之中卽寓解散之意蒙此又該知府王九德親詣各州縣督同各掌印官西充縣知縣汪淵岳池縣去任知縣葉中彥蓬州知州陳其志各於前議運府穀內動支賑濟本府移去饑民又撥發廣安隣水

營山等州縣饑民各給印票赴大竹縣支領計該運府穀壹萬石各項動支共叁千捌百壹拾肆石叁斗大竹縣照舊貯倉未動穀壹千玖百壹拾石陸斗又運夫支過穀叁百柒拾陸石叁斗柒升實運到府穀叁千捌百玖壹百伍拾伍石壹斗給南充縣壹拾壹里中下人戶張文朝等壹萬餘家以作救恤依秋成抵斗還倉外餘穀貳千柒百肆拾叁石陸

斗叁升見貯府倉隨奉兩道案驗准本司咨照奉撫院案驗准戶部咨爲勘議旱傷乞賜賑蠲以延民困事該四川巡按衙門題稱順慶府地方災傷乞要給賑本部覆議題奉

欽依移咨本院備案仰司官吏卽便馬上移文守巡川北道并順慶府欽遵查照被災州縣輕重貧民多寡選委廉幹官員動支倉穀從公給賑務使貧窮得霑實惠其里胥人等敢有詭名虛冒者從重究治事完之日該司造冊

齎院

奏繳奉此轉行到府又該知府王九德親詣被災州縣督同各掌印等官廣安州知州蘭養直南充縣知縣杜若芝營山縣知縣張顯然渠縣署印推官劉懷民鄰水縣知縣喬允遷大竹縣知縣馮忠各動倉穀賑濟通計本府并所屬州縣共支過稻穀叁萬伍百叁拾玖石伍斗肆升叁合陸勺賑過饑民共壹拾叁萬伍千肆百柒拾壹名口又運夫工食穀叁

百柒拾陸石叁斗柒升等因准此又查得前奉撫院批據保寧府申稱閬中南部二縣與順慶河道相通民間米豆被鄰境般運空虛價值騰貴乞賑極貧軍民并儒學貧生由詳奉批仰布政司議確詳報奉此該本司覆議呈詳本院奉批貳縣米豆旣被般運空虛價值高貴如議卽發倉穀賑濟極貧軍民使速霑實惠無容積猾冒領事完冊報繳奉此備行閬中南部二縣共支稻穀壹千玖百伍石

伍斗賑濟貧生軍民參千捌百壹拾壹名口  
俱應備造文冊呈乞覈實

奏繳等因并另具揭帖內稱行准東北各道開  
報放賑官員除知府王軒王九德通判皇甫  
賓岳一崙推官劉懷民知州錢効節宋希張  
蘭養直知縣李陶成趙弘訓羅俊民黃承讚  
鍾國芝唐選繆守之徐天佑初學易劉養用  
杜若芝張顯然喬允遷教諭施所學各料理  
得法民霑實惠及除物故官外安居縣知縣

祝存正綜理頗周完報獨蚤卽其文爲之飾  
似非闕茸之流但未奉賑文之前發糶倉穀  
捌百餘石每石官價貳錢伍分外多銀貳分  
吏王好察張述祖索銀各壹分方許收銀奉  
文賑穀用報參貳斗實止給穀壹斗通縣民  
兵夫馬門阜等役各給穀石不知本等工食  
作何下落吏書人等各領穀參伍石緣賑以  
爲民而該縣反腴在官之人事礙官箴已經  
委勘隨據同知張守訓勘稱親詣境內拘審

饑民弔查冊籍造給雖多實支則少以致事  
體不一議論紛紜計剩存在倉穀止該貳千  
壹百石有奇今倒廩盤量除該吏王好察通  
同書手張奉惟斗級黃元學等共侵貳拾伍  
石外其實在之數積出附餘穀叁百捌拾捌  
石有零若謂盡屬斛面則千零所積似不應  
若是其多也跡涉曖昧業屬垂涎之私穀見  
貯存尚非入囊之物至於平糶稻穀每石原  
定價銀貳錢伍分增添分文已爲溢額而戶

吏乘機却又需索糶戶據知府王軒揭稱本  
官當饑荒之歲區處亦勤核注措之詳蹤跡  
多舛停糶明文尋至而倉穀捌百壹拾貳石  
何糶之急也則其取贏之心難保必無鄉民  
顆粒未霑而衙役貳百肆拾伍人何憐之深  
也雖奉議價之批竟置不省穀增至叁百捌  
拾以爲附餘似矣乃舊歲查盤報折者又係  
何穀何倉豈收則不足而支則有餘耶冊造  
給貳千伍升謂之從厚可矣顧饑民供報所



支者率多壹人壹斗豈官以恩施而民以怨  
報耶事如有待心跡恐屬難明穀未離廩侵  
漁猶然未竟璧山縣知縣張思明始設粥以  
待哺民艱似切旣抱病而伏枕弊實遂叢即  
其未病之先於本身原無濡染然以弗察之  
故致員役得肆奸欺縱無玷於官箴亦何裨  
於賑事大竹縣知縣馮忠量粟不行看驗各  
役得以行私散給不示定期窮民苦於守候  
不親賑事徒委之典史徐國昌以致用陸升

之斗而侵欺入已數多已給散於民而門皂  
奪回無忌蓋知縣馮忠則救荒不勤而典史  
徐國昌則因賑射利璧山縣主簿今陞邯鄲  
縣縣丞岑大緯該知縣張思明發穀舂米捌  
拾貳石委大緯於來鳳驛煮粥以哺饑民本  
官及戶吏林桂鎬經手支銷通同乾沒將穀  
發與米戶帥顯俊周一元等拾陸名每米壹  
斗變價壹錢肆分交送本官却以壹錢貳分  
買白米於白崖鎮雇船載回私家書快門皂

斗級保戶乘機侵盜冒領各有簿票可查據  
同知張守訓揭稱奉委查勘是的知府王軒  
揭稱主簿岑大緯煮粥侵米放賑侵穀設心  
同壟斷增價變銀減價買米取利盡錙銖以  
致斗級吏識鼠竊不貲門阜歇家瓜分無忌  
允爲罪魁應從重治  
豐都縣署印本縣主簿  
楊宗桂議賑數少覈報稍遲緣以委瑣小官  
未諳拯救大體大足縣署印合州儒學學正  
許登瀛雖効勛尚稽程課功無足錄罪或

可原  
綦江縣署印忠州儒學學正葉繼龍始  
慮伍遷債轅而委以邑事顧尋伍遷故轅而  
錄其舊文桑榆似堪補過首肯終屬代庖各  
緣由到司除二府掌印等官綜理有條賑放  
無議者及主簿楊宗桂學正許登瀛葉繼龍  
接印未久推情可原外該本司左布政使彭  
富會同按察司按察使陳薦爲照知縣祝存  
正惠先各役曾何加意于民物未入囊若嫌  
垂涎官帑知縣張思明抱病失察致佐貳之

貪婪知縣馮忠救荒不勤滋首領之縱肆主簿岑大緯典史徐國昌分委欺公因賑射利設心行事雖各不同作奸犯科其罪則一俱應議處等因併報到臣案照重順二府去歲旱傷小民饑饉臣卽會同前巡按御史傳一面具

題一面行文發運稻穀亟加賑濟續准本部咨文兩次覆議題奉

欽依備咨前來俱經案行遵照及令該司將放賑

官員分別揭報去後今據前因臣竊惟

朝廷能煥發

德意不惜捐帑藏之積加惠窮民而

君門萬里不能必窮民之實受其惠臣節制一方能宣布

朝廷德澤以蘇此子遺而提封連數千里不能以一人之耳目手足徧徇問閭之疾苦所期同心共濟體

國憂民恃有監司之分猷守令之盡職耳故惠

不及民與無惠同賑無實濟與不賑同臣始也慮人心之玩易首懸勸懲之典以感動而竦惕之且申令不啻再三程督極爲嚴切令旣告竣矣倉廩盡發補助尚施臣之心力雖自省竭盡然吹死灰而肉白骨不知能幾何人耳中間饑死者不可復生流亡者未卜來復卽匹夫匹婦不得其所皆守臣之責也臣爲此懼方待罪不遑何暇復問屬吏顧臣立法而食言是臣先自處於僞而後來者有事應具

奏除賑冊另疏

亦何以風勵百一乎旣經監司甄別前來相得總賑官重慶府知府王軒拯救千里已極拮据之勞計備三時尤徵桑土之密順慶府知府王九德皇皇行賑流寓咸被其恩汲汲濟人士民舉戴其德分賑官重慶府通判皇甫賓岳一崙順慶府推官劉懷民忠州知州

錢効節合州知州宋希張廣安州知州蘭養  
直銅梁縣知縣李陶成墊江縣知縣趙弘訓  
武隆縣知縣羅俊民彭水縣知縣黃承讚永  
川縣知縣鍾國芝江津縣知縣唐選黔江縣  
知縣繆守之南川縣知縣徐天佑榮昌縣知  
縣初學易定遠縣知縣劉養用南充縣知縣  
杜若芝營山縣知縣張顯然隣水縣知縣喬  
允遷長壽縣儒學教諭施所學恤災捍患並  
勤勩於一時飯餓周窮各綏輯乎千室以上

諸臣勤勞俱著但係本職之當脩尚虞天譴  
之未答除臣照憲牌事理行檄勸勞鄧都縣  
主簿楊宗桂合州儒學學正許登瀛忠州儒  
學學正葉繼龍功過免議并將不職佐領璧  
山縣陞任主簿岑大緯大竹縣典史徐國昌  
已行守巡該道提究追贓外再照川東旱災  
惟巴縣長壽爲甚且其管轄甚廣措置甚難  
而其時勢又甚急已故長壽縣知縣儲登選  
巴縣知縣許安國皆盡心竭力勤瘁以死許

安國歷任尚淺若儲登選業經臣

題考滿廉明素著無忝循良各屬尚未經營而本官查審貧丁已畢故其給散獨蚤升斗獨多今賑卹固可稽也臣課二府賑事登選當爲州縣賢能之最死後分守道令經紀其家事尚不足支歸櫬之費蓋棺而人品定已此二臣者臣若以其物故不一爲之闡揚是使勞於

王事而以身徇之者反至泯泯無聞非所以教

人臣忠也故不避瑣煩特爲表而出之二臣初故臣卽行賻助今賑事報完應仍動官銀分別優恤其家除臣徑自施行外參照大竹縣知縣馮忠年幾七旬政無一善民瘼全不關意官守日以隳頽應照罷輒例革職閑住者也安居縣知縣祝存正瘠民肥已岑念榮獨之當哀無實有名抑何粉飾之太甚此一臣者論其冊報多虛卽擬斥亦不爲過據其別議未著故一青或在堪原應照不及例重

加降調以示懲創者也璧山縣知縣張思明  
值米珠薪桂之時叢鼠竊狗偷之弊緣偶病  
出於意外且蒞任甫及數旬應重加罰治以  
勵將來者也伏乞

勅下該部再加查議如果臣等所言不謬將馮忠  
等分別議處罰治庶憲條非落空言而荒政  
不無裨補矣緣係賑事久完甄別已確乞

賜議處不職官員以重

德意以勵人心事理未敢擅便爲此具本謹題請

旨

請換威茂關防疏

題爲印信事據四川布政使司整飭威茂兵備  
綜理糧儲右叅議兼按察司僉事許守恩呈  
稱本道關防壹顆驗係嘉靖元年捌月內禮  
部題

請頒給嘉字伍拾柒號內篆整飭威茂兵備關防  
捌字至今陸拾玖年篆文模糊行用不便呈  
乞

請換等因到臣卷查先准禮部咨爲遵奉



明旨釐革宿弊事內開以後各該巡撫會同巡按  
官每年通查所屬大小衙門如有應換印信  
明開篆文字數具

奏換給舊印亦代爲

奏繳又准禮部咨爲傳奉事內開各撫按官通  
查所屬衙門印信如有模糊未經換給者作  
速具

奏以憑覆

請鑄換等因各移咨前來通行遵照外今據前因

該臣會同巡按四川監察御史李

議照

印信以防奸僞篆文貴在顯明今該道關防  
旣因年久模糊不便行用委應鑄換理合具  
題伏乞

勅下禮部鑄造整飭威茂兵備關防壹顆前來給  
該道行使其舊關防聽臣代爲

奏繳緣係印信事理未敢擅便爲此具本謹題  
請

旨

教職遵例迴避疏

題爲遵例迴避事據四川布政使司呈奉臣批  
據保寧府劍州梓潼縣申准本縣儒學牒呈  
准本學教諭任校關稱卑職見年貳拾玖歲  
雲南臨安衛籍河南衛輝府淇縣人由舉人  
萬曆拾柒年伍月內除授今職本年捌月拾  
伍日到任今照卑職親兄任梓原由敘州府  
推官近陞劍州知州於拾捌年伍月貳拾壹  
日到任梓潼縣係劍州所屬例得從卑迴避

卑職叨任儒學萬里寒官合蒙具

題就近改調或仍赴部改選等因由詳奉批仰  
布政司查報奉此又蒙巡按四川監察李御  
史批據該縣申前事蒙批布政司查報蒙此  
該本司查得梓潼縣教諭任校係見任劍州  
知州任梓之弟例應從卑迴避呈乞會疏具  
奏聽吏部查有相應員缺

題改等因呈詳到臣卷查萬曆伍年玖月內准  
都察院咨爲遵例迴避乞賜題

請以便供職事准吏部咨該廣西撫按衙門具  
題本部查得

大明會典內一款凡內外管屬衙門官員有係父  
子兄弟叔姪者從卑迴避欽此及議得以後應  
該迴避官員俱從官職卑者迴避永爲遵守  
等因題奉

欽依備咨前來通行遵照近據梓潼縣申詳前事  
已經批司查報去後今據前因該臣會同巡  
按四川監察御史李 議照劍州梓潼縣

儒學教諭任校其兄任梓新任本州知州考  
之

令甲委當迴避既經該司覆查明白相應照例  
具

題伏乞

勅下該部將教諭任校卽查蜀省相應員缺就近  
改補令其到任庶卑寒之官免跋涉之苦而  
於

典制既不違於人情亦甚便矣緣係遵例迴避事

旨

理未敢擅便爲此具本謹題請